

IOB

Capitulum:	1	2	3	4	5	6	7	8	9	10	11	12	13	14	15	16			
	17	18	19	20	21	22	23	24	25	26	27	28	29	30	31	32	33	34	35
	36	37	38	39	40	41	42												

CAPITULUM 1

Vir erat in terra Hus nomine Iob et erat vir ille simplex et rectus ac timens Deum et recedens a malo

2 nati sunt ei septem filii et tres filiae

3 et fuit possessio eius septem milia ovium et tria milia camelorum quingenta quoque iuga boum et quingentae asinae ac familia multa nimis eratque vir ille magnus inter omnes Orientales

4 et ibant filii eius et faciebant convivium per domos unusquisque in die suo et mittentes vocabant tres sorores suas ut comederent et biberent cum eis

5 cumque in orbem transissent dies convivii mittebat ad eos Iob et sanctificabat illos consurgensque diluculo offerebat holocausta per singulos dicebat enim ne forte peccaverint filii mei et benedixerint Deo in cordibus suis sic faciebat Iob cunctis diebus

6 quadam autem die cum venissent filii Dei ut adsisterent coram Domino adfuit inter eos etiam Satan

7 cui dixit Dominus unde venis qui respondens ait circuivi terram et perambulavi eam

8 dixitque Dominus ad eum numquid considerasti servum meum Iob quod non sit ei similis in terra homo simplex et rectus et timens Deum ac recedens a malo

9 cui respondens Satan ait numquid frustra timet Iob Deum

10 nonne tu vallasti eum ac domum eius universamque substantiam per circuitum operibus manuum eius benedixisti et possessio illius crevit in terra

11 sed extende paululum manum tuam et tange cuncta quae possidet nisi in facie tua benedixerit tibi

12 dixit ergo Dominus ad Satan ecce universa quae habet in manu tua sunt tantum in eum ne extendas manum tuam egressusque est Satan a facie Domini

13 cum autem quadam die filii et filiae eius comederent et biberent vinum in domo fratris sui primogeniti

14 nuntius venit ad Iob qui diceret boves arabant et asinae pascebantur iuxta eos

15 et irruerunt Sabei tuleruntque omnia et pueros percusserunt gladio et evasi ego solus ut nuntiarem tibi

16 cumque adhuc ille loqueretur venit alter et dixit ignis Dei cecidit e caelo et tactas oves puerosque consumpsit et effugi ego solus ut nuntiarem tibi

17 sed et illo adhuc loquente venit alius et dixit Chaldei fecerunt tres turmas et invaserunt

camelos et tulerunt eos necnon et pueros percusserunt gladio et ego fugi solus ut nuntiarem tibi

¹⁸ loquebatur ille et ecce alius intravit et dixit filiis tuis et filiabus vescentibus et bibentibus vinum in domo fratris sui primogeniti

¹⁹ repente ventus vehemens inruit a regione deserti et concussit quattuor angulos domus quae corruens oppressit liberos tuos et mortui sunt et effugi ego solus ut nuntiarem tibi

²⁰ tunc surrexit Iob et scidit tunicam suam et tonso capite corruens in terram adoravit

²¹ et dixit nudus egressus sum de utero matris meae et nudus revertar illuc Dominus dedit Dominus abstulit sit nomen Domini benedictum

²² in omnibus his non peccavit Iob neque stultum quid contra Deum locutus est

CAPITULUM 2

factum est autem cum quadam die venissent filii Dei et starent coram Domino venisset quoque Satan inter eos et staret in conspectu eius

² ut diceret Dominus ad Satan unde venis qui respondens ait circuivi terram et perambulavi eam

³ et dixit Dominus ad Satan numquid considerasti servum meum Iob quod non sit ei similis in terra vir simplex et rectus timens Deum ac recedens a malo et adhuc retinens innocentiam tu autem commovisti me adversus eum ut adfligerem illum frustra

⁴ cui respondens Satan ait pellem pro pelle et cuncta quae habet homo dabit pro anima sua

⁵ alioquin mitte manum tuam et tange os eius et carnem et tunc videbis quod in facie benedicat tibi

⁶ dixit ergo Dominus ad Satan ecce in manu tua est verumtamen animam illius serva

⁷ egressus igitur Satan a facie Domini percussit Iob ulcere pessimo a planta pedis usque ad verticem eius

⁸ qui testa saniem deradebat sedens in sterquilinio

⁹ dixit autem illi uxor sua adhuc tu permanes in simplicitate tua benedic Deo et morere

¹⁰ qui ait ad illam quasi una de stultis locuta es si bona suscepimus de manu Domini quare mala non suscipiamus in omnibus his non peccavit Iob labiis suis

¹¹ igitur audientes tres amici Iob omne malum quod accidisset ei venerunt singuli de loco suo Eliphaz Themanites et Baldad Suites et Sophar Naamathites condixerant enim ut pariter venientes visitarent eum et consolarentur

¹² cumque levassent procul oculos suos non cognoverunt eum et exclamantes ploraverunt scissisque vestibibus sparserunt pulverem super caput suum in caelum

¹³ et sederunt cum eo in terram septem diebus et septem noctibus et nemo loquebatur ei verbum videbant enim dolorem esse vehementem

CAPITULUM 3

post haec aperuit Iob os suum et maledixit diei suo

² et locutus est

³ pereat dies in qua natus sum et nox in qua dictum est conceptus est homo

⁴ dies ille vertatur in tenebras non requirat eum Deus desuper et non inlustret lumine

⁵ obscurent eum tenebrae et umbra mortis occupet eum caligo et involvatur amaritudine
⁶ noctem illam tenebrosus turbo possideat non computetur in diebus anni nec numeretur in mensibus
⁷ sit nox illa solitaria nec laude digna
⁸ maledicant ei qui maledicunt diei qui parati sunt suscitare Leviathan
⁹ obtenebrentur stellae caligine eius expectet lucem et non videat nec ortum surgentis aurorae
¹⁰ quia non conclusit ostia ventris qui portavit me nec abstulit mala ab oculis meis
¹¹ quare non in vulva mortuus sum egressus ex utero non statim perii
¹² quare exceptus genibus cur lactatus uberibus
¹³ nunc enim dormiens silerem et somno meo requiescerem
¹⁴ cum regibus et consulibus terrae qui aedificant sibi solitudines
¹⁵ aut cum principibus qui possident aurum et replent domos suas argento
¹⁶ aut sicut abortivum absconditum non subsisterem vel qui concepti non viderunt lucem
¹⁷ ibi impii cessaverunt a tumultu et ibi requieverunt fessi robore
¹⁸ et quondam vincti pariter sine molestia non audierunt vocem exactoris
¹⁹ parvus et magnus ibi sunt et servus liber a domino suo
²⁰ quare data est misero lux et vita his qui in amaritudine animae sunt
²¹ qui expectant mortem et non venit quasi effodientes thesaurum
²² gaudentque vehementer cum invenerint sepulchrum
²³ viro cuius abscondita est via et circumdedit eum Deus tenebris
²⁴ antequam comedam suspiro et quasi inundantes aquae sic rugitus meus
²⁵ quia timor quem timebam evenit mihi et quod verebar accidit
²⁶ nonne dissimulavi nonne silui nonne quievi et venit super me indignatio

CAPITULUM 4

Respondens autem Eliphaz Themanites dixit

² si coeperimus loqui tibi forsitan moleste accipias sed conceptum sermonem tenere quis possit
³ ecce docuisti multos et manus lassas roborasti
⁴ vacillantes confirmaverunt sermones tui et genua trementia confortasti
⁵ nunc autem venit super te plaga et defecisti tetigit te et conturbatus es
⁶ timor tuus fortitudo tua patientia tua et perfectio viarum tuarum
⁷ recordare obsecro te quis umquam innocens perierit aut quando recti deleti sint
⁸ quin potius vidi eos qui operantur iniquitatem et seminant dolores et metunt eos
⁹ flante Deo perisse et spiritu irae eius esse consumptos
¹⁰ rugitus leonis et vox leaenae et dentes catulorum leonum contriti sunt
¹¹ tigris periit eo quod non haberet praedam et catuli leonis dissipati sunt
¹² porro ad me dictum est verbum absconditum et quasi furtive suscepit auris mea venas susurri eius
¹³ in horrore visionis nocturnae quando solet sopor occupare homines
¹⁴ pavor tenuit me et tremor et omnia ossa mea perterrita sunt

- 15** et cum spiritus me praesente transiret inhorruerunt pili carnis meae
16 stetit quidam cuius non agnoscebam vultum imago coram oculis meis et vocem quasi
aurae lenis audivi
17 numquid homo Dei conparatione iustificabitur aut factore suo purior erit vir
18 ecce qui serviunt ei non sunt stabiles et in angelis suis repperit pravitatem
19 quanto magis hii qui habitant domos luteas qui terrenum habent fundamentum
consumentur velut a tineas
20 de mane usque ad vesperum succidentur et quia nullus intellegit in aeternum peribunt
21 qui autem reliqui fuerint auferentur ex eis morientur et non in sapientia

CAPITULUM 5

- V**oca ergo si est qui tibi respondeat et ad aliquem sanctorum convertere
2 vere stultum interficit iracundia et parvulum occidit invidia
3 ego vidi stultum firma radice et maledixi pulchritudini eius statim
4 longe fient filii eius a salute et conterentur in porta et non erit qui eruat
5 cuius messem famelicus comedet et ipsum rapiet armatus et ebibent sitientes divitias
eius
6 nihil in terra sine causa fit et de humo non orietur dolor
7 homo ad laborem nascitur et avis ad volatum
8 quam ob rem ego deprecabor Dominum et ad Deum ponam eloquium meum
9 qui facit magna et inscrutabilia et mirabilia absque numero
10 qui dat pluviam super faciem terrae et inrigat aquis universa
11 qui ponit humiles in sublimi et maerentes erigit sospitate
12 qui dissipat cogitationes malignorum ne possint implere manus eorum quod coeperant
13 qui adprehendit sapientes in astutia eorum et consilium pravorum dissipat
14 per diem incurrent tenebras et quasi in nocte sic palpabunt in meridie
15 porro salvum faciet a gladio oris eorum et de manu violenti pauperem
16 et erit egeno spes iniquitas autem contrahet os suum
17 beatus homo qui corripitur a Domino increpationem ergo Domini ne reprobes
18 quia ipse vulnerat et medetur percutit et manus eius sanabunt
19 in sex tribulationibus liberabit te et in septima non tanget te malum
20 in fame eruet te de morte et in bello de manu gladii
21 a flagello linguae absconderis et non timebis calamitatem cum venerit
22 in vastitate et fame ridebis et bestiam terrae non formidabis
23 sed cum lapidibus regionum pactum tuum et bestiae terrae pacificae erunt tibi
24 et scies quod pacem habeat tabernaculum tuum et visitans speciem tuam non peccabis
25 scies quoque quoniam multiplex erit semen tuum et progenies tua quasi herba terrae
26 ingredieris in abundantia sepulchrum sicut infertur acervus in tempore suo
27 ecce hoc ut investigavimus ita est quod auditum mente pertracta

CAPITULUM 6

respondens autem Iob dixit

² utinam adpenderentur peccata mea quibus iram merui et calamitas quam patior in statera

³ quasi harena maris haec gravior appareret unde et verba mea dolore sunt plena

⁴ quia sagittae Domini in me sunt quarum indignatio ebibit spiritum meum et terrores Domini militant contra me

⁵ numquid rugiet onager cum habuerit herbam aut mugiet bos cum ante praesepe plenum steterit

⁶ aut poterit comedi insulsum quod non est sale conditum aut potest aliquis gustare quod gustatum adfert mortem

⁷ quae prius tangere nolebat anima mea nunc prae angustia cibi mei sunt

⁸ quis det ut veniat petitio mea et quod expecto tribuat mihi Deus

⁹ et qui coepit ipse me conterat solvat manum suam et succidat me

¹⁰ et haec mihi sit consolatio ut adfligens me dolore non parcat nec contradicam sermonibus Sancti

¹¹ quae est enim fortitudo mea ut sustineam aut quis finis meus ut patienter agam

¹² nec fortitudo lapidum fortitudo mea nec caro mea aerea est

¹³ ecce non est auxilium mihi in me et necessarii quoque mei recesserunt a me

¹⁴ qui tollit ab amico suo misericordiam timorem Domini derelinquit

¹⁵ fratres mei praeterierunt me sicut torrens qui raptim transit in convallibus

¹⁶ qui timent pruina inruet super eos nix

¹⁷ tempore quo fuerint dissipati peribunt et ut incaluerit solventur de loco suo

¹⁸ involutae sunt semitae gressuum eorum ambulabunt in vacuum et peribunt

¹⁹ considerate semitas Theman itinera Saba et expectate paulisper

²⁰ confusi sunt quia speravi venerunt quoque usque ad me et pudore cooperti sunt

²¹ nunc venistis et modo videntes plagam meam timetis

²² numquid dixi adferte mihi et de substantia vestra donate mihi

²³ vel liberate me de manu hostis et de manu robustorum eruite me

²⁴ docete me et ego tacebo et si quid forte ignoravi instruite me

²⁵ quare detraxistis sermonibus veritatis cum e vobis nullus sit qui possit arguere

²⁶ ad increpandum tantum eloquia concinnatis et in ventum verba profertis

²⁷ super pupillum inruitis et subvertere nitimini amicum vestrum

²⁸ verumtamen quod coepistis explete praebete aurem et videte an mentiar

²⁹ respondete obsecro absque contentione et loquentes id quod iustum est iudicate

³⁰ et non invenietis in lingua mea iniquitatem nec in faucibus meis stultitia personabit

CAPITULUM 7

militia est vita hominis super terram et sicut dies mercennarii dies eius

² sicut servus desiderat umbram et sicut mercennarius praestolatur finem operis sui

³ sic et ego habui menses vacuos et noctes laboriosas enumeravi mihi

⁴ si dormiero dico quando consurgam et rursum expectabo vesperam et replebor doloribus usque ad tenebras

⁵ induta est caro mea putredine et sordibus pulveris cutis mea aruit et contracta est
⁶ dies mei velocius transierunt quam a texente tela succiditur et consumpti sunt absque ulla spe
⁷ memento quia ventus est vita mea et non revertetur oculus meus ut videat bona
⁸ nec aspiciet me visus hominis oculi tui in me et non subsistam
⁹ sicut consumitur nubes et pertransit sic qui descenderit ad inferos non ascendet
¹⁰ nec revertetur ultra in domum suam neque cognoscet eum amplius locus eius
¹¹ quapropter et ego non parcam ori meo loquar in tribulatione spiritus mei confabulabor cum amaritudine animae meae
¹² numquid mare sum ego aut cetus quia circumdedisti me carcere
¹³ si dixero consolabitur me lectulus meus et relevabor loquens mecum in strato meo
¹⁴ terrebis me per somnia et per visiones horrore concuties
¹⁵ quam ob rem elegit suspendium anima mea et mortem ossa mea
¹⁶ desperavi nequaquam ultra iam vivam parce mihi nihil enim sunt dies mei
¹⁷ quid est homo quia magnificas eum aut quia ponis erga eum cor tuum
¹⁸ visitas eum diluculo et subito probas illum
¹⁹ usquequo non parces mihi nec dimittis me ut gluttiam salivam meam
²⁰ peccavi quid faciam tibi o custos hominum quare posuisti me contrarium tibi et factus sum mihimet ipsi gravis
²¹ cur non tolles peccatum meum et quare non auferes iniquitatem meam ecce nunc in pulvere dormiam et si mane me quaesieris non subsistam

CAPITULUM 8

Respondens autem Baldad Suites dixit
² usquequo loqueris talia et spiritus multiplex sermones oris tui
³ numquid Deus subplantat iudicium et Omnipotens subvertit quod iustum est
⁴ etiam si filii tui peccaverunt ei et dimisit eos in manu iniquitatis suae
⁵ tu tamen si diluculo consurrexeris ad Deum et Omnipotentem fueris deprecatus
⁶ si mundus et rectus incesseris statim evigilabit ad te et pacatum reddet habitaculum iustitiae tuae
⁷ in tantum ut priora tua fuerint parva et novissima tua multiplicentur nimis
⁸ interroga enim generationem pristinam et diligenter investiga patrum memoriam
⁹ hesterni quippe sumus et ignoramus quoniam sicut umbra dies nostri sunt super terram
¹⁰ et ipsi docebunt te loquentur tibi et de corde suo proferent eloquia
¹¹ numquid vivere potest scirpus absque humore aut crescet carectum sine aqua
¹² cum adhuc sit in flore nec carpatur manu ante omnes herbas arescit
¹³ sic viae omnium qui obliviscuntur Deum et spes hypocritae peribit
¹⁴ non ei placebit vecordia sua et sicut tela araneorum fiducia eius
¹⁵ innitetur super domum suam et non stabit fulciet eam et non consurget
¹⁶ humectus videtur antequam veniat sol et in horto suo germen eius egreditur
¹⁷ super acervum petrarum radices eius densabuntur et inter lapides commorabitur
¹⁸ si absorbuerit eum de loco suo negabit eum et dicet non novi te
¹⁹ haec est enim laetitia viae eius ut rursum de terra alii germinentur

- ²⁰ Deus non proiciet simplicem nec porriget manum malignis
²¹ donec impleatur risu os tuum et labia tua iubilo
²² qui oderunt te induentur confusione et tabernaculum impiorum non subsistet

CAPITULUM 9

Et respondens Iob ait

- ² vere scio quod ita sit et quod non iustificetur homo conpositus Deo
³ si voluerit contendere cum eo non poterit ei respondere unum pro mille
⁴ sapiens corde est et fortis robore quis restitit ei et pacem habuit
⁵ qui transtulit montes et nescierunt hii quos subvertit in furore suo
⁶ qui commovet terram de loco suo et columnae eius concutiuntur
⁷ qui praecipit soli et non oritur et stellas claudit quasi sub signaculo
⁸ qui extendit caelos solus et graditur super fluctus maris
⁹ qui facit Arcturum et Oriona et Hyadas et interiora austri
¹⁰ qui facit magna et inconprehensibilia et mirabilia quorum non est numerus
¹¹ si venerit ad me non videbo si abierit non intellegam eum
¹² si repente interroget quis respondebit ei vel quis dicere potest cur facis
¹³ Deus cuius resistere irae nemo potest et sub quo curvantur qui portant orbem
¹⁴ quantus ergo sum ego qui respondeam ei et loquar verbis meis cum eo
¹⁵ qui etiam si habuero quippiam iustum non respondebo sed meum iudicem deprecabor
¹⁶ et cum invocantem exaudierit me non credo quod audierit vocem meam
¹⁷ in turbine enim conteret me et multiplicabit vulnera mea etiam sine causa
¹⁸ non concedit requiescere spiritum meum et implet me amaritudinibus
¹⁹ si fortitudo quaeritur robustissimus est si aequitas iudicii nemo pro me audet testimonium dicere
²⁰ si iustificare me voluero os meum condemnabit me si innocentem ostendere pravum me conprobabit
²¹ etiam si simplex fuero hoc ipsum ignorabit anima mea et taedebit me vitae meae
²² unum est quod locutus sum et innocentem et impium ipse consumit
²³ si flagellat occidat semel et non de poenis innocentum rideat
²⁴ terra data est in manu impii vultum iudicum eius operit quod si non ille est quis ergo est
²⁵ dies mei velociores fuerunt cursore fugerunt et non viderunt bonum
²⁶ pertransierunt quasi naves poma portantes sicut aquila volans ad escam
²⁷ cum dixero nequaquam ita loquar commuto faciem meam et dolore torqueor
²⁸ verebar omnia opera mea sciens quod non parceres delinquenti
²⁹ si autem et sic impius sum quare frustra laboravi
³⁰ si lotus fuero quasi aquis nivis et fulserint velut mundissimae manus meae
³¹ tamen sordibus intingues me et abominabuntur me vestimenta mea
³² neque enim viro qui similis mei est respondebo nec qui mecum in iudicio ex aequo possit audiri

³³ non est qui utrumque valeat arguere et ponere manum suam in ambobus

³⁴ auferat a me virgam suam et pavor eius non me terreat

³⁵ loquar et non timebo eum neque enim possum metuens respondere

CAPITULUM 10

Taedet animam meam vitae meae dimittam adversum me eloquium meum loquar in amaritudine animae meae

² dicam Deo noli me condemnare indica mihi cur me ita iudices

³ numquid bonum tibi videtur si calumnieris et opprimas me opus manuum tuarum et consilium impiorum adiuves

⁴ numquid oculi carnei tibi sunt aut sicut videt homo et tu videbis

⁵ numquid sicut dies hominis dies tui et anni tui sicut humana sunt tempora

⁶ ut quaeras iniquitatem meam et peccatum meum scruteris

⁷ et scias quia nihil impium fecerim cum sit nemo qui de manu tua possit eruere

⁸ manus tuae plasmaverunt me et fecerunt me totum in circuitu et sic repente praecipitas me

⁹ memento quaeso quod sicut lutum feceris me et in pulverem reduces me

¹⁰ nonne sicut lac mulsisti me et sicut caseum me coagulasti

¹¹ pelle et carnibus vestisti me et ossibus et nervis conpegisti me

¹² vitam et misericordiam tribuisti mihi et visitatio tua custodivit spiritum meum

¹³ licet haec celes in corde tuo tamen scio quia universorum memineris

¹⁴ si peccavi et ad horam pepercisti mihi cur ab iniquitate mea mundum me esse non pateris

¹⁵ et si impius fuero vae mihi est et si iustus non levabo caput saturatus afflictione et miseria

¹⁶ et propter superbiam quasi leaenam capies me reversusque mirabiliter me crucias

¹⁷ instauras testes tuos contra me et multiplicas iram tuam adversum me et poenae militant in me

¹⁸ quare de vulva eduxisti me qui utinam consumptus essem ne oculus me videret

¹⁹ fuissem quasi qui non essem de utero translatus ad tumulum

²⁰ numquid non paucitas dierum meorum finietur brevi dimitte ergo me ut plangam paululum dolorem meum

²¹ antequam vadam et non revertar ad terram tenebrosam et opertam mortis caligine

²² terram miseriae et tenebrarum ubi umbra mortis et nullus ordo et sempiternus horror inhabitans

CAPITULUM 11

Respondens autem Sophar Naamathites dixit

² numquid qui multa loquitur non et audiet aut vir verbosus iustificabitur

³ tibi soli tacebunt homines et cum ceteros inriseris a nullo confutaberis

⁴ dixisti enim purus est sermo meus et mundus sum in conspectu tuo

⁵ atque utinam Deus loqueretur tecum et aperiret labia sua tibi

⁶ ut ostenderet tibi secreta sapientiae et quod multiplex esset lex eius et intellegeres quod multo minora exigaris a Deo quam meretur iniquitas tua
⁷ forsitan vestigia Dei comprehendes et usque ad perfectum Omnipotentem repperies
⁸ excelsior caelo est et quid facies profundior inferno et unde cognosces
⁹ longior terrae mensura eius et latior mari
¹⁰ si subverterit omnia vel in unum coartaverit quis contradicet ei
¹¹ ipse enim novit hominum vanitatem et videns iniquitatem nonne considerat
¹² vir vanus in superbiam erigitur et tamquam pullum onagri se liberum natum putat
¹³ tu autem firmasti cor tuum et expandisti ad eum manus tuas
¹⁴ si iniquitatem quod est in manu tua abstuleris a te et non manserit in tabernaculo tuo iniustitia
¹⁵ tum levare poteris faciem tuam absque macula et eris stabilis et non timebis
¹⁶ miseriae quoque oblivisceris et quasi aquarum quae praeterierint recordaberis
¹⁷ et quasi meridianus fulgor consurget tibi ad vesperam et cum te consumptum putaveris orieris ut lucifer
¹⁸ et habebis fiduciam proposita tibi spe et defossus securus dormies
¹⁹ requiesces et non erit qui te exterreat et deprecabuntur faciem tuam plurimi
²⁰ oculi autem impiorum deficient et effugium peribit ab eis et spes eorum abominatio animae

CAPITULUM 12

Respondens autem Iob dixit

² ergo vos estis soli homines et vobiscum morietur sapientia
³ et mihi est cor sicut et vobis nec inferior vestri sum quis enim haec quae nostis ignorat
⁴ qui deridetur ab amico suo sicut ego invocabit Deum et exaudiet eum deridetur enim iusti simplicitas
⁵ lampas contempta apud cogitationes divitum parata ad tempus statutum
⁶ abundant tabernacula praedonum et audacter provocant Deum cum ipse dederit omnia in manibus eorum
⁷ nimirum interroga iumenta et docebunt te et volatilia caeli et indicabunt tibi
⁸ loquere terrae et respondebit tibi et narrabunt pisces maris
⁹ quis ignorat quod omnia haec manus Domini fecerit
¹⁰ in cuius manu anima omnis viventis et spiritus universae carnis hominis
¹¹ nonne auris verba diiudicat et fauces comedentis saporem
¹² in antiquis est sapientia et in multo tempore prudentia
¹³ apud ipsum est sapientia et fortitudo ipse habet consilium et intellegentiam
¹⁴ si destruxerit nemo est qui aedificet et si incluserit hominem nullus est qui aperiat
¹⁵ si continuerit aquas omnia siccabuntur et si emisit eas subvertent terram
¹⁶ apud ipsum est fortitudo et sapientia ipse novit et decipientem et eum qui decipitur
¹⁷ adducit consiliarios in stultum finem et iudices in stuporem
¹⁸ balteum regum dissolvit et praecingit fune renes eorum
¹⁹ ducit sacerdotes inglorios et optimates subplantat
²⁰ commutans labium veracium et doctrinam senum auferens

- 21 effundit despectionem super principes et eos qui oppressi fuerant relevans
22 qui revelat profunda de tenebris et producit in lucem umbram mortis
23 qui multiplicat gentes et perdet eas et subversas in integrum restituet
24 qui inmutat cor principum populi terrae et decipit eos ut frustra incedant per invium
25 palpabunt quasi in tenebris et non in luce et errare eos faciet quasi ebrios

CAPITULUM 13

- E**cce omnia et vidit oculus meus et audivit auris mea et intellexi singula
2 secundum scientiam vestram et ego novi nec inferior vestri sum
3 sed tamen ad Omnipotentem loquar et disputare cum Deo cupio
4 prius vos ostendens fabricatores mendacii et cultores perversorum dogmatum
5 atque utinam taceretis ut putaremini esse sapientes
6 audite ergo correptiones meas et iudicium labiorum meorum adtendite
7 numquid Deus indiget vestro mendacio ut pro illo loquamini dolos
8 numquid faciem eius accipitis et pro Deo iudicare nitimini
9 aut placebit ei quem celare nihil potest aut decipietur ut homo vestris fraudulentis
10 ipse vos arguet quoniam in abscondito faciem eius accipitis
11 statim ut se commoverit turbabit vos et terror eius inruet super vos
12 memoria vestra conparabitur cineri et redigentur in lutum cervices vestrae
13 tacete paulisper ut loquar quodcumque mihi mens suggesserit
14 quare lacero carnes meas dentibus meis et animam meam porto in manibus meis
15 etiam si occiderit me in ipso sperabo verumtamen vias meas in conspectu eius arguam
16 et ipse erit salvator meus non enim veniet in conspectu eius omnis hypocrita
17 audite sermonem meum et enigmata percipite auribus vestris
18 si fuero iudicatus scio quod iustus inveniar
19 quis est qui iudicetur mecum veniat quare tacens consumor
20 duo tantum ne facias mihi et tunc a facie tua non abscondar
21 manum tuam longe fac a me et formido tua non me terreat
22 et voca me et respondebo tibi aut certe loquar et tu responde mihi
23 quantas habeo iniquitates et peccata scelera mea et delicta ostende mihi
24 cur faciem tuam abscondis et arbitraris me inimicum tuum
25 contra folium quod vento rapitur ostendis potentiam tuam et stipulam siccam persequeris
26 scribis enim contra me amaritudines et consumere me vis peccatis adolescentiae meae
27 posuisti in nervo pedem meum et observasti omnes semitas meas et vestigia pedum meorum considerasti
28 qui quasi putredo consumendus sum et quasi vestimentum quod comeditur a tineis

CAPITULUM 14

homo natus de muliere brevi vivens tempore repletus multis miseriis

² quasi flos egreditur et conteritur et fugit velut umbra et numquam in eodem statu permanet

³ et dignum ducis super huiuscemodi aperire oculos tuos et adducere eum tecum in iudicium

⁴ quis potest facere mundum de inmundo conceptum semine nonne tu qui solus es

⁵ breves dies hominis sunt numerus mensuum eius apud te est constituisti terminos eius qui praeterire non poterunt

⁶ recede paululum ab eo ut quiescat donec optata veniat sicut mercennarii dies eius

⁷ lignum habet spem si praecisum fuerit rursum virescit et rami eius pullulant

⁸ si senuerit in terra radix eius et in pulvere emortuus fuerit truncus illius

⁹ ad odorem aquae germinabit et faciet comam quasi cum primum plantatum est

¹⁰ homo vero cum mortuus fuerit et nudatus atque consumptus ubi quaeso est

¹¹ quomodo si recedant aquae de mari et fluvius vacuefactus arescat

¹² sic homo cum dormierit non resurget donec adteratur caelum non evigilabit nec consurget de somno suo

¹³ quis mihi hoc tribuat ut in inferno protegas me ut abscondas me donec pertranseat furor tuus et constituas mihi tempus in quo recorderis mei

¹⁴ putasne mortuus homo rursum vivet cunctis diebus quibus nunc milito expecto donec veniat inmutatio mea

¹⁵ vocabis et ego respondebo tibi operi manuum tuarum porriges dexteram

¹⁶ tu quidem gressus meos dinumerasti sed parces peccatis meis

¹⁷ signasti quasi in sacco delicta mea sed curasti iniquitatem meam

¹⁸ mons cadens defluet et saxum transfertur de loco suo

¹⁹ lapides excavant aquae et adluvione paulatim terra consumitur et homines ergo similiter perdes

²⁰ roborasti eum paululum ut in perpetuum pertransiret inmutabis faciem eius et emittes eum

²¹ sive nobiles fuerint filii eius sive ignobiles non intellegit

²² attamen caro eius dum vivet dolebit et anima illius super semet ipso lugebit

CAPITULUM 15

respondens autem Eliphaz Themanites dixit

² numquid sapiens respondebit quasi in ventum loquens et implebit ardore stomachum suum

³ arguis verbis eum qui non est aequalis tui et loqueris quod tibi non expedit

⁴ quantum in te est evacuasti timorem et tulisti preces coram Deo

⁵ docuit enim iniquitas tua os tuum et imitaris linguam blasphemantium

⁶ condemnabit te os tuum et non ego et labia tua respondebunt tibi

⁷ numquid primus homo tu natus es et ante colles formatus

⁸ numquid consilium Dei audisti et inferior te erit eius sapientia

⁹ quid nosti quod ignoremus quid intellegis quod nesciamus

¹⁰ et senes et antiqui sunt in nobis multo vetustiores quam patres tui

- 11 numquid grande est ut consoletur te Deus sed verba tua prava hoc prohibent
12 quid te elevat cor tuum et quasi magna cogitans adtonitos habes oculos
13 quid tumet contra Deum spiritus tuus ut proferas de ore huiuscemodi sermones
14 quid est homo ut immaculatus sit et ut iustus appareat natus de muliere
15 ecce inter sanctos eius nemo inmutabilis et caeli non sunt mundi in conspectu eius
16 quanto magis abominabilis et inutilis homo qui bibit quasi aquas iniquitatem
17 ostendam tibi audi me quod vidi narrabo tibi
18 sapientes confitentur et non abscondunt patres suos
19 quibus solis data est terra et non transibit alienus per eos
20 cunctis diebus suis impius superbit et numerus annorum incertus est tyrannidis eius
21 sonitus terroris semper in auribus illius et cum pax sit ille insidias suspicatur
22 non credit quod reverti possit de tenebris circumspectans undique gladium
23 cum se moverit ad quaerendum panem novit quod paratus sit in manu eius tenebrarum dies
24 terrebit eum tribulatio et angustia vallabit eum sicut regem qui praeparatur ad proelium
25 tetendit enim adversus Deum manum suam et contra Omnipotentem roboratus est
26 cucurrit adversus eum erecto collo et pingui cervice armatus est
27 operuit faciem eius crassitudo et de lateribus eius arvina dependet
28 habitavit in civitatibus desolatis et in domibus desertis quae in tumulos sunt redactae
29 non ditabitur nec perseverabit substantia eius nec mittet in terra radicem suam
30 non recedet de tenebris ramos eius arefaciet flamma et auferetur spiritu oris sui
31 non credat frustra errore deceptus quod aliquo pretio redimendus sit
32 antequam dies eius impleantur peribit et manus eius arescet
33 laedetur quasi vinea in primo flore botrus eius et quasi oliva proiciens florem suum
34 congregatio enim hypocritae sterilis et ignis devorabit tabernacula eorum qui munera libenter accipiunt
35 concepit dolorem et peperit iniquitatem et uterus eius praeparat dolos

CAPITULUM 16

Respondens autem Iob dixit

- 2 audiivi frequenter talia consolatores onerosi omnes vos estis
3 numquid habebunt finem verba ventosa aut aliquid tibi molestum est si loquaris
4 poteram et ego similia vestri loqui atque utinam esset anima vestra pro anima mea
5 consolarer et ego vos sermonibus et moverem caput meum super vos (16:6) roborarem vos ore meo et moverem labia quasi parcens vobis
6 (16:7) sed quid agam si locutus fuero non quiescet dolor meus et si tacuero non recedet a me
7 (16:8) nunc autem oppressit me dolor meus et in nihili redacti sunt omnes artus mei
8 (16:9) rugae meae testimonium dicunt contra me et suscitatur falsiloquus adversus faciem meam contradicens mihi
9 (16:10) collegit furorem suum in me et comminans mihi infremuit contra me dentibus suis hostis meus terribilibus oculis me intuitus est
10 (16:11) aperuerunt super me ora sua exprobrantes percusserunt maxillam meam satiati

sunt poenis meis

11 (16:12) conclusit me Deus apud iniquum et manibus impiorum me tradidit

12 (16:13) ego ille quondam opulentus repente contritus sum tenuit cervicem meam confregit me et posuit sibi quasi in signum

13 (16:14) circumdedit me lanceis suis convulneravit lumbos meos non pepercit et effudit in terra viscera mea

14 (16:15) concidit me vulnere super vulnus inruit in me quasi gigans

15 (16:16) saccum consui super cutem meam et operui cinere cornu meum

16 (16:17) facies mea intumuit a fletu et palpebrae meae caligaverunt

17 (16:18) haec passus sum absque iniquitate manus meae cum haberem mundas ad Deum preces

18 (16:19) terra ne operias sanguinem meum neque inveniat locum in te latendi clamor meus

19 (16:20) ecce enim in caelo testis meus et conscius meus in excelsis

20 (16:21) verbosi mei amici mei ad Deum stillat oculus meus

21 (16:22) atque utinam sic iudicaretur vir cum Deo quomodo iudicatur filius hominis cum collega suo

22 (16:23) ecce enim breves anni transeunt et semitam per quam non revertar ambulo

CAPITULUM 17

Spiritus meus adtenuabitur dies mei breviabuntur et solum mihi superest sepulchrum

2 non peccavi et in amaritudinibus moratur oculus meus

3 libera me et pone iuxta te et cuiusvis manus pugnet contra me

4 cor eorum longe fecisti a disciplina et propterea non exaltabuntur

5 praedam pollicetur sociis et oculi filiorum eius deficient

6 posuit me quasi in proverbium vulgi et exemplum sum coram eis

7 caligavit ab indignatione oculus meus et membra mea quasi in nihili redacta sunt

8 stupebunt iusti super hoc et innocens contra hypocritam suscitabitur

9 et tenebit iustus viam suam et mundis manibus addet fortitudinem

10 igitur vos omnes convertimini et venite et non inveniam in vobis ullum sapientem

11 dies mei transierunt cogitationes meae dissipatae sunt torquentes cor meum

12 noctem verterunt in diem et rursum post tenebras spero lucem

13 si sustinuero infernus domus mea est in tenebris stravi lectulum meum

14 putredini dixi pater meus es mater mea et soror mea vermibus

15 ubi est ergo nunc praestolatio mea et patientiam meam quis considerat

16 in profundissimum infernum descendent omnia mea putasne saltem ibi erit requies mihi

CAPITULUM 18

Respondens autem Baldad Suites dixit

2 usque ad quem finem verba iactabitis intellegite prius et sic loquamur

3 quare reputati sumus ut iumenta et sorduimus coram vobis

4 qui perdis animam tuam in furore tuo numquid propter te derelinquetur terra et

transferentur rupes de loco suo

⁵ nonne lux impii extinguetur nec splendet flamma ignis eius

⁶ lux obtenebrescet in tabernaculo illius et lucerna quae super eum est extinguetur

⁷ artabuntur gressus virtutis eius et praecipitabit eum consilium suum

⁸ inmisit enim in rete pedes suos et in maculis eius ambulat

⁹ tenebitur planta illius laqueo et exardescet contra eum sitis

¹⁰ abscondita est in terra pedica eius et decipula illius super semitam

¹¹ undique terrebunt eum formidines et involvent pedes eius

¹² adtenuetur fame robur eius et inedia invadat costas illius

¹³ devoret pulchritudinem cutis eius consumat brachia illius primogenita mors

¹⁴ avellatur de tabernaculo suo fiducia eius et calcet super eum quasi rex interitus

¹⁵ habitent in tabernaculo illius socii eius qui non est aspergatur in tabernaculo eius sulphur

¹⁶ deorsum radices eius siccentur sursum autem adteratur messis eius

¹⁷ memoria illius pereat de terra et non celebretur nomen eius in plateis

¹⁸ expellet eum de luce in tenebras et de orbe transferet eum

¹⁹ non erit semen eius neque progenies in populo suo nec ullae reliquiae in regionibus eius

²⁰ in die eius stupebunt novissimi et primos invadet horror

²¹ haec sunt ergo tabernacula iniqui et iste locus eius qui ignorat Deum

CAPITULUM 19

Respondens autem Iob dixit

² usquequo adfligitis animam meam et adteritis me sermonibus

³ en decies confunditis me et non erubescitis opprimentes me

⁴ nempe et si ignoravi mecum erit ignorantia mea

⁵ at vos contra me erigimini et arguitis me obprobriis meis

⁶ saltem nunc intellegite quia Deus non aequo iudicio adflixerit me et flagellis suis me cinxerit

⁷ ecce clamabo vim patiens et nemo audiet vociferabor et non est qui iudicet

⁸ semitam meam circumsepsit et transire non possum et in calle meo tenebras posuit

⁹ spoliavit me gloria mea et abstulit coronam de capite meo

¹⁰ destruxit me undique et pereo et quasi evulsae arbori abstulit spem meam

¹¹ iratus est contra me furor eius et sic me habuit quasi hostem suum

¹² simul venerunt latrones eius et fecerunt sibi viam per me et obsederunt in gyro tabernaculum meum

¹³ fratres meos longe fecit a me et noti mei quasi alieni recesserunt a me

¹⁴ dereliquerunt me propinqui mei et qui me noverant obliti sunt mei

¹⁵ inquilini domus meae et ancillae meae sicut alienum habuerunt me et quasi peregrinus fui in oculis eorum

¹⁶ servum meum vocavi et non respondit ore proprio deprecabar illum

¹⁷ halitum meum exhorruit uxor mea et orabam filios uteri mei

¹⁸ stulti quoque despiciebant me et cum ab eis recessissem detrahebant mihi

- 19 abominati sunt me quondam consilarii mei et quem maxime diligebam aversatus est me
- 20 pelli meae consumptis carnibus adhesit os meum et derelicta sunt tantummodo labia circa dentes meos
- 21 miseremini mei miseremini mei saltem vos amici mei quia manus Domini tetigit me
- 22 quare persequimini me sicut Deus et carnibus meis saturamini
- 23 quis mihi tribuat ut scribantur sermones mei quis mihi det ut exarentur in libro
- 24 stilo ferreo et plumbi lammina vel certe sculpantur in silice
- 25 scio enim quod redemptor meus vivat et in novissimo de terra surrecturus sim
- 26 et rursum circumdabor pelle mea et in carne mea videbo Deum
- 27 quem visurus sum ego ipse et oculi mei conspecturi sunt et non alius reposita est haec spes mea in sinu meo
- 28 quare ergo nunc dicitis persequamur eum et radicem verbi inveniamus contra eum
- 29 fugite ergo a facie gladii quoniam ultor iniquitatum gladius est et scitote esse iudicium

CAPITULUM 20

- R**espondens autem Sophar Naamathites dixit
- 2 idcirco cogitationes meae variae succedunt sibi et mens in diversa rapitur
- 3 doctrinam qua me arguis audiam et spiritus intellegentiae meae respondebit mihi
- 4 hoc scio a principio ex quo positus est homo super terram
- 5 quod laus impiorum brevis sit et gaudium hypocritae ad instar puncti
- 6 si ascenderit usque ad caelum superbia eius et caput eius nubes tetigerit
- 7 quasi sterquilinum in fine perdetur et qui eum viderant dicent ubi est
- 8 velut somnium avolans non invenietur transiet sicut visio nocturna
- 9 oculus qui eum viderat non videbit neque ultra intuebitur eum locus suus
- 10 filii eius adterentur egestate et manus illius reddent ei dolorem suum
- 11 ossa eius implebuntur vitiis adolescentiae eius et cum eo in pulverem dormient
- 12 cum enim dulce fuerit in ore eius malum abscondet illud sub lingua sua
- 13 parcat illi et non derelinquet illud et celabit in gutture suo
- 14 panis eius in utero illius vertetur in fel aspidum intrinsecus
- 15 divitias quas devoravit evomet et de ventre illius extrahet eas Deus
- 16 caput aspidum suget occidet eum lingua viperae
- 17 non videat rivulos fluminis torrentes mellis et butyri
- 18 luet quae fecit omnia nec tamen consumetur iuxta multitudinem adinventionum suarum sic et sustinebit
- 19 quoniam confringens nudavit pauperes domum rapuit et non aedificavit eam
- 20 nec est satiatus venter eius et cum habuerit quae cupierat possidere non poterit
- 21 non remansit de cibo eius et propterea nihil permanebit de bonis eius
- 22 cum satiatus fuerit artabitur aestuabit et omnis dolor inruet in eum
- 23 utinam impleatur venter eius ut emittat in eum iram furoris sui et pluat super illum bellum suum
- 24 fugiet arma ferrea et inruet in arcum aereum
- 25 eductus et egrediens de vagina sua et fulgurans in amaritudine sua vadent et venient

super eum horribiles

²⁶ omnes tenebrae absconditae sunt in occultis eius devorabit eum ignis qui non succenditur adfligetur relictus in tabernaculo suo

²⁷ revelabunt caeli iniquitatem eius et terra consurget adversus eum

²⁸ apertum erit germen domus illius detrahetur in die furoris Dei

²⁹ haec est pars hominis impii a Deo et hereditas verborum eius a Domino

CAPITULUM 21

Respondens autem Iob dixit

² audite quaeso sermones meos et agetis paenitentiam

³ sustinete me ut et ego loquar et post mea si videbitur verba ridete

⁴ numquid contra hominem disputatio mea est ut merito non debeam contristari

⁵ adtendite me et obstupescite et superponite digitum ori vestro

⁶ et ego quando recordatus fuero pertimesco et concutit carnem meam tremor

⁷ quare ergo impii vivunt sublevati sunt confortatique divitiis

⁸ semen eorum permanet coram eis propinquorum turba et nepotum in conspectu eorum

⁹ domus eorum securae sunt et pacatae et non est virga Dei super illos

¹⁰ bos eorum concepit et non abortit vacca peperit et non est privata fetu suo

¹¹ egrediuntur quasi greges parvuli eorum et infantes eorum exultant lusibus

¹² tenent tympanum et citharam et gaudent ad sonitum organi

¹³ ducunt in bonis dies suos et in puncto ad inferna descendunt

¹⁴ qui dixerunt Deo recede a nobis et scientiam viarum tuarum nolumus

¹⁵ quid est Omnipotens ut serviamus ei et quid nobis prodest si oraverimus illum

¹⁶ verumtamen quia non sunt in manu eorum bona sua consilium impiorum longe sit a me

¹⁷ quotiens lucerna impiorum extinguetur et superveniet eis inundatio et dolores dividet furoris sui

¹⁸ erunt sicut paleae ante faciem venti et sicut favilla quam turbo dispergit

¹⁹ Deus servabit filiis illius dolorem patris et cum reddiderit tunc sciet

²⁰ videbunt oculi eius interfectionem suam et de furore Omnipotentis bibet

²¹ quid enim ad eum pertinet de domo sua post se et si numerus mensuum eius dimidietur

²² numquid Deum quispiam docebit scientiam qui excelsos iudicat

²³ iste moritur robustus et sanus dives et felix

²⁴ viscera eius plena sunt adipe et medullis ossa illius inrigantur

²⁵ alius vero moritur in amaritudine animae absque ullis opibus

²⁶ et tamen simul in pulverem dormient et vermes operient eos

²⁷ certe novi cogitationes vestras et sententias contra me iniquas

²⁸ dicitis enim ubi est domus principis et ubi tabernacula impiorum

²⁹ interrogate quemlibet de viatoribus et haec eadem eum intellegere cognoscetis

³⁰ quia in diem perditionis servabitur malus et ad diem furoris ducitur

³¹ quis arguet coram eo viam eius et quae fecit quis reddet illi

³² ipse ad sepulchra ducetur et in congerie mortuorum vigilabit

³³ dulcis fuit glareis Cocyti et post se omnem hominem trahet et ante se innumerabiles
³⁴ quomodo igitur consolamini me frustra cum responsio vestra repugnare ostensa sit
veritati

CAPITULUM 22

Respondens autem Eliphaz Themanites dixit
² numquid Deo comparari potest homo etiam cum perfectae fuerit scientiae
³ quid prodest Deo si iustus fueris aut quid ei confers si immaculata fuerit via tua
⁴ numquid timens arguet te et veniet tecum in iudicium
⁵ et non propter malitiam tuam plurimam et infinitas iniquitates tuas
⁶ abstulisti enim pignus fratrum tuorum sine causa et nudos spoliasti vestibus
⁷ aquam lasso non dedisti et esurienti subtraxisti panem
⁸ in fortitudine brachii tui possidebas terram et potentissimus obtinebas eam
⁹ viduas dimisisti vacuas et lacertos pupillorum comminuisti
¹⁰ propterea circumdatus es laqueis et conturbat te formido subita
¹¹ et putabas te tenebras non visurum et impetu aquarum inundantium non oppressurum
¹² an cogitas quod Deus excelsior caelo et super stellarum vertices sublimetur
¹³ et dicis quid enim novit Deus et quasi per caliginem iudicat
¹⁴ nubes latibulum eius nec nostra considerat et circa cardines caeli perambulat
¹⁵ numquid semitam saeculorum custodire cupis quam calcaverunt viri iniqui
¹⁶ qui sublati sunt ante tempus suum et fluvijs subvertit fundamentum eorum
¹⁷ qui dicebant Deo recede a nobis et quasi nihil possit facere Omnipotens aestimabant
eum
¹⁸ cum ille implesset domos eorum bonis quorum sententia procul sit a me
¹⁹ videbunt iusti et laetabuntur et innocens subsannabit eos
²⁰ nonne succisa est erectio eorum et reliquias eorum devoravit ignis
²¹ adquiesce igitur ei et habeto pacem et per haec habebis fructus optimos
²² suscipe ex ore illius legem et pone sermones eius in corde tuo
²³ si reversus fueris ad Omnipotentem aedificaberis et longe facies iniquitatem a
tabernaculo tuo
²⁴ dabit pro terra silicem et pro silice torrentes aureos
²⁵ eritque Omnipotens contra hostes tuos et argentum coacervabitur tibi
²⁶ tunc super Omnipotentem delicijs afflues et elevabis ad Deum faciem tuam
²⁷ rogabis eum et exaudiet te et vota tua reddes
²⁸ decernes rem et veniet tibi et in viis tuis splendeat lumen
²⁹ qui enim humiliatus fuerit erit in gloria et qui inclinaverit oculos suos ipse salvabitur
³⁰ salvabitur innocens salvabitur autem munditia manuum suarum

CAPITULUM 23

respondens autem Iob dixit

² nunc quoque in amaritudine est sermo meus et manus plagae meae adgravata est super gemitum meum

³ quis mihi tribuat ut cognoscam et inveniam illum et veniam usque ad solium eius

⁴ ponam coram eo iudicium et os meum replebo increpationibus

⁵ ut sciam verba quae mihi respondeat et intellegam quid loquatur mihi

⁶ nolo multa fortitudine contendat mecum nec magnitudinis suae mole me premat

⁷ proponat aequitatem contra me et perveniat ad victoriam iudicium meum

⁸ si ad orientem iero non apparet si ad occidentem non intellegam eum

⁹ si ad sinistram quid agat non adprehendam eum si me vertam ad dextram non videbo illum

¹⁰ ipse vero scit viam meam et probavit me quasi aurum quod per ignem transit

¹¹ vestigia eius secutus est pes meus viam eius custodivi et non declinavi ex ea

¹² a mandatis labiorum eius non recessi et in sinu meo abscondi verba oris eius

¹³ ipse enim solus est et nemo avertere potest cogitationem eius et anima eius quodcumque voluerit hoc facit

¹⁴ cum expleverit in me voluntatem suam et alia multa similia praesto sunt ei

¹⁵ et idcirco a facie eius turbatus sum et considerans eum timore sollicitor

¹⁶ Deus mollivit cor meum et Omnipotens conturbavit me

¹⁷ non enim perii propter imminentes tenebras nec faciem meam operuit caligo

CAPITULUM 24

ab Omnipotente non sunt abscondita tempora qui autem noverunt eum ignorant dies illius

² alii terminos transtulerunt diripuerunt greges et paverunt eos

³ asinum pupillorum abigerunt et abstulerunt pro pignore bovem viduae

⁴ subverterunt pauperum viam et oppresserunt pariter mansuetos terrae

⁵ alii quasi onagri in deserto egrediuntur ad opus suum vigilantesque ad praedam praeparant panem liberis

⁶ agrum non suum demetunt et vineam eius quem vi oppresserunt vindemiant

⁷ nudos dimittunt homines indumenta tollentes quibus non est operimentum in frigore

⁸ quos imbres montium rigant et non habentes velamen amplexantur lapides

⁹ vim fecerunt depraedantes pupillos et vulgum pauperem spoliaverunt

¹⁰ nudis et incedentibus absque vestitu et esurientibus tulerunt spicas

¹¹ inter acervos eorum meridiati sunt qui calcatis torcularibus sitiunt

¹² de civitatibus fecerunt viros gemere et anima vulneratorum clamavit et Deus inultum abire non patitur

¹³ ipsi fuerunt rebelles luminis nescierunt vias eius nec reversi sunt per semitas illius

¹⁴ mane primo consurgit homicida interficit egenum et pauperem per noctem vero erit quasi fur

¹⁵ oculus adulteri observat caliginem dicens non me videbit oculus et operiet vultum suum

¹⁶ perfodit in tenebris domos sicut in die condixerant sibi et ignoraverunt lucem

¹⁷ si subito apparuerit aurora arbitrantur umbram mortis et sic in tenebris quasi in luce

ambulant

18 levis est super faciem aquae maledicta sit pars eius in terra nec ambulet per viam vinearum

19 ad nimium calorem transeat ab aquis nivium et usque ad inferos peccatum illius

20 obliviscatur eius misericordia dulcedo illius vermes non sit in recordatione sed conteratur quasi lignum infructuosum

21 pavit enim sterilem et quae non parit et viduae bene non fecit

22 detraxit fortes in fortitudine sua et cum steterit non credet vitae suae

23 dedit ei Deus locum paenitentiae et ille abutitur eo in superbiam oculi autem eius sunt in viis illius

24 elevati sunt ad modicum et non subsistent et humiliabuntur sicut omnia et auferentur et sicut summitates spicarum conterentur

25 quod si non est ita quis me potest arguere esse mentitum et ponere ante Deum verba mea

CAPITULUM 25

Respondens autem Baldad Suites dixit

2 potestas et terror apud eum est qui facit concordiam in sublimibus suis

3 numquid est numerus militum eius et super quem non surget lumen illius

4 numquid iustificari potest homo comparatus Deo aut apparere mundus natus de muliere

5 ecce etiam luna non splendet et stellae non sunt mundaе in conspectu eius

6 quanto magis homo putredo et filius hominis vermis

CAPITULUM 26

Respondens autem Iob dixit

2 cuius adiutor es numquid inbecilli et sustentas brachium eius qui non est fortis

3 cui dedisti consilium forsitan illi qui non habet sapientiam et prudentiam tuam ostendisti plurimam

4 quem docere voluisti nonne eum qui fecit spiramen tuum

5 ecce gigantes gemunt sub aquis et qui habitant cum eis

6 nudus est inferus coram illo et nullum est operimentum perditioni

7 qui extendit aquilonem super vacuum et adpendit terram super nihili

8 qui ligat aquas in nubibus suis ut non erumpant pariter deorsum

9 qui tenet vultum solii sui et expandit super illud nebulam suam

10 terminum circumdedit aquis usque dum finiantur lux et tenebrae

11 columnae caeli contremescunt et pavent ad nutum eius

12 in fortitudine illius repente maria congregata sunt et prudentia eius percussit superbum

13 spiritus eius ornavit caelos et obsetricante manu eius eductus est coluber tortuosus

14 ecce haec ex parte dicta sunt viarum eius et cum vix parvam stillam sermonis eius audierimus quis poterit tonitruum magnitudinis illius intueri

CAPITULUM 27

addidit quoque Iob adsumens parabolam suam et dixit

² vivit Deus qui abstulit iudicium meum et Omnipotens qui ad amaritudinem adduxit animam meam

³ quia donec superest halitus in me et spiritus Dei in naribus meis

⁴ non loquentur labia mea iniquitatem nec lingua mea meditabitur mendacium

⁵ absit a me ut iustos vos esse iudicem donec deficiam non recedam ab innocentia mea

⁶ iustificationem meam quam coepi tenere non deseram nec enim reprehendit me cor meum in omni vita mea

⁷ sit ut impius inimicus meus et adversarius meus quasi iniquus

⁸ quae enim spes est hypocritae si avare rapiat et non liberet Deus animam eius

⁹ numquid clamorem eius Deus audiet cum venerit super illum angustia

¹⁰ aut poterit in Omnipotente delectari et invocare Deum in omni tempore

¹¹ docebo vos per manum Dei quae Omnipotens habeat nec abscondam

¹² ecce vos omnes nostis et quid sine causa vana loquimini

¹³ haec est pars hominis impii apud Deum et hereditas violentorum quam ab Omnipotente suscipient

¹⁴ si multiplicati fuerint filii eius in gladio erunt et nepotes eius non saturabuntur pane

¹⁵ qui reliqui fuerint ex eo sepelientur in interitu et viduae illius non plorabunt

¹⁶ si conportaverit quasi terram argentum et sicut lutum praeparaverit vestimenta

¹⁷ praeparabit quidem sed iustus vestietur illis et argentum innocens dividet

¹⁸ aedificavit sicut tinea domum suam et sicut custos fecit umbraculum

¹⁹ dives cum dormierit nihil secum auferet aperit oculos suos et nihil inveniet

²⁰ adprehendit eum quasi aqua inopia nocte opprimet eum tempestas

²¹ tollet eum ventus urens et auferet et velut turbo rapiet eum de loco suo

²² et mittet super eum et non parcat de manu eius fugiens fugiet

²³ stringet super eum manus suas et sibilabit super illum intuens locum eius

CAPITULUM 28

habet argentum venarum suarum principia et auro locus est in quo conflatur

² ferrum de terra tollitur et lapis solutus calore in aes vertitur

³ tempus posuit tenebris et universorum finem ipse considerat lapidem quoque caliginis et umbram mortis

⁴ dividit torrens a populo peregrinante eos quos oblitus est pes egentis hominum et invios

⁵ terra de qua oriebatur panis in loco suo igne subversa est

⁶ locus sapphyri lapides eius et glebae illius aurum

⁷ semitam ignoravit avis nec intuitus est oculus vulturis

⁸ non calcaverunt eam filii institorum nec pertransivit per eam leaena

⁹ ad silicem extendit manum suam subvertit a radicibus montes

¹⁰ in petris rivos excidit et omne pretiosum vidit oculus eius

¹¹ profunda quoque fluviorum scrutatus est et abscondita produxit in lucem

¹² sapientia vero ubi invenitur et quis est locus intellegentiae

¹³ nescit homo pretium eius nec invenitur in terra suaviter viventium

- ¹⁴ abyssus dicit non est in me et mare loquitur non est mecum
¹⁵ non dabitur aurum obrizum pro ea nec adpendetur argentum in commutatione eius
¹⁶ non conferetur tinctis Indiae coloribus nec lapidi sardonico pretiosissimo vel sapphyro
¹⁷ non adaequabitur ei aurum vel vitrum nec commutabuntur pro ea vasa auri
¹⁸ excelsa et eminentia non memorabuntur conparatione eius trahitur autem sapientia de occultis
¹⁹ non adaequabitur ei topazium de Aethiopia nec tincturae mundissimae componetur
²⁰ unde ergo sapientia veniet et quis est locus intellegentiae
²¹ abscondita est ab oculis omnium viventium volucres quoque caeli latet
²² perditio et mors dixerunt auribus nostris audivimus famam eius
²³ Deus intellegit viam eius et ipse novit locum illius
²⁴ ipse enim fines mundi intuetur et omnia quae sub caelo sunt respicit
²⁵ qui fecit ventis pondus et aquas adpendit mensura
²⁶ quando ponebat pluviis legem et viam procellis sonantibus
²⁷ tunc vidit illam et enarravit et praeparavit et investigavit
²⁸ et dixit homini ecce timor Domini ipsa est sapientia et recedere a malo intellegentia

CAPITULUM 29

addidit quoque Iob adsumens parabolam suam et dixit

- ² quis mihi tribuat ut sim iuxta menses pristinos secundum dies quibus Deus custodiebat me
³ quando splendebat lucerna eius super caput meum et ad lumen eius ambulabam in tenebris
⁴ sicut fui in diebus adolescentiae meae quando secreto Deus erat in tabernaculo meo
⁵ quando erat Omnipotens mecum et in circuitu meo pueri mei
⁶ quando lavabam pedes meos butyro et petra fundebat mihi rivos olei
⁷ quando procedebam ad portam civitatis et in platea parabant cathedram mihi
⁸ videbant me iuvenes et abscondebantur et senes adsurgentes stabant
⁹ principes cessabant loqui et digitum superponebant ori suo
¹⁰ vocem suam cohibebant duces et lingua eorum gutturi suo adherebat
¹¹ auris audiens beatificabat me et oculus videns testimonium reddebat mihi
¹² quod liberassem pauperem vociferantem et pupillum cui non esset adiutor
¹³ benedictio perituri super me veniebat et cor viduae consolatus sum
¹⁴ iustitia indutus sum et vestivit me sicut vestimento et diademate iudicio meo
¹⁵ oculus fui caeco et pes claudus
¹⁶ pater eram pauperum et causam quam nesciebam diligentissime investigabam
¹⁷ conterebam molas iniqui et de dentibus illius auferebam praedam
¹⁸ dicebamque in nidulo meo moriar et sicut palma multiplicabo dies
¹⁹ radix mea aperta est secus aquas et ros morabitur in messione mea
²⁰ gloria mea semper innovabitur et arcus meus in manu mea instaurabitur
²¹ qui me audiebant expectabant sententiam et intenti tacebant ad consilium meum
²² verbis meis addere nihil audebant et super illos stillabat eloquium meum

- ²³ expectabant me sicut pluviam et os suum aperiebant quasi ad imbrem serotinum
²⁴ si quando ridebam ad eos non credebant et lux vultus mei non cadebat in terram
²⁵ si voluissem ire ad eos sedebam primus cumque sederem quasi rex circumstante exercitu eram tamen maerentium consolator

CAPITULUM 30

nunc autem derident me iuniores tempore quorum non dignabar patres ponere cum canibus gregis mei

- ² quorum virtus manuum erat mihi pro nihilo et vita ipsa putabantur indigni
³ egestate et fame steriles qui rodebant in solitudine squalentes calamitate et miseria
⁴ et mandebant herbas et arborum cortices et radix iuniperorum erat cibus eorum
⁵ qui de convallibus ista rapientes cum singula repperissent ad ea cum clamore currebant
⁶ in desertis habitabant torrentium et in cavernis terrae vel super glaream
⁷ qui inter huiusmodi laetabantur et esse sub sentibus delicias computabant
⁸ filii stultorum et ignobilium et in terra penitus non parentes
⁹ nunc in eorum canticum versus sum et factus sum eis proverbium
¹⁰ abominantur me et longe fugiunt a me et faciem meam conspuere non verentur
¹¹ faretram enim suam aperuit et adflixit me et frenum posuit in os meum
¹² ad dexteram orientis calamitatis meae ilico surrexerunt pedes meos subverterunt et oppresserunt quasi fluctibus semitis suis
¹³ dissipaverunt itinera mea insidiati sunt mihi et praevaluerunt et non fuit qui ferret auxilium
¹⁴ quasi rupto muro et aperta ianua intruerunt super me et ad meas miseras devoluti sunt
¹⁵ redactus sum in nihili abstulisti quasi ventus desiderium meum et velut nubes pertransiit salus mea
¹⁶ nunc autem in memet ipso marcescit anima mea et possident me dies afflictionis
¹⁷ nocte os meum perforatur doloribus et qui me comedunt non dormiunt
¹⁸ in multitudine eorum consumitur vestimentum meum et quasi caputio tunicae sic cinxerunt me
¹⁹ comparatus sum luto et adsimilatus favillae et cineri
²⁰ clamo ad te et non exaudis me sto et non respicis me
²¹ mutatus es mihi in crudelem et in duritia manus tuae adversaris mihi
²² elevasti me et quasi super ventum ponens elisisti me valide
²³ scio quia morti tradas me ubi constituta domus est omni viventi
²⁴ verumtamen non ad consumptionem eorum emittis manum tuam et si corruerint ipse salvabis
²⁵ flebam quondam super eum qui adflictus erat et conpatiebatur anima mea pauperi
²⁶ expectabam bona et venerunt mihi mala praestolabar lucem et eruperunt tenebrae
²⁷ interiora mea efferbuerunt absque ulla requie praevenierunt me dies afflictionis
²⁸ maerens incedebam sine furore consurgens in turba clamavi
²⁹ frater fui draconum et socius strutionum
³⁰ cutis mea denigrata est super me et ossa mea aruerunt prae caumate
³¹ versa est in luctum cithara mea et organum meum in vocem flentium

CAPITULUM 31

- p**epigi foedus cum oculis meis ut ne cogitarem quidem de virgine
- ² quam enim partem haberet Deus in me desuper et hereditatem Omnipotens de excelsis
- ³ numquid non perditio est iniquo et alienatio operantibus iniustitiam
- ⁴ nonne ipse considerat vias meas et cunctos gressus meos dinumerat
- ⁵ si ambulavi in vanitate et festinavi in dolo pes meus
- ⁶ adpendat me in statera iusta et sciat Deus simplicitatem meam
- ⁷ si declinavit gressus meus de via et si secutum est oculos meos cor meum et in manibus meis adhesit macula
- ⁸ seram et alius comedat et progenies mea eradicetur
- ⁹ si deceptum est cor meum super mulierem et si ad ostium amici mei insidiatus sum
- ¹⁰ scortum sit alteri uxor mea et super illam incurventur alii
- ¹¹ hoc enim nefas est et iniquitas maxima
- ¹² ignis est usque ad perditionem devorans et omnia eradicans genimina
- ¹³ si contempsi subire iudicium cum servo meo et ancillae meae cum disceptarent adversum me
- ¹⁴ quid enim faciam cum surrexerit ad iudicandum Deus et cum quaesierit quid respondebo illi
- ¹⁵ numquid non in utero fecit me qui et illum operatus est et formavit in vulva unus
- ¹⁶ si negavi quod volebant pauperibus et oculos viduae expectare feci
- ¹⁷ si comedi buccellam meam solus et non comedit pupillus ex ea
- ¹⁸ quia ab infantia mea crevit mecum miseratio et de utero matris meae egressa est mecum
- ¹⁹ si despexi pereuntem eo quod non habuerit indumentum et absque operimento pauperem
- ²⁰ si non benedixerunt mihi latera eius et de velleribus ovium mearum calefactus est
- ²¹ si levavi super pupillum manum meam etiam cum viderem me in porta superiorem
- ²² umerus meus a iunctura sua cadat et brachium meum cum suis ossibus confringatur
- ²³ semper enim quasi tumentes super me fluctus timui Deum et pondus eius ferre non potui
- ²⁴ si putavi aurum robur meum et obrizae dixi fiducia mea
- ²⁵ si laetatus sum super multis divitiis meis et quia plurima repperit manus mea
- ²⁶ si vidi solem cum fulgeret et lunam incedentem clare
- ²⁷ et lactatum est in abscondito cor meum et osculatus sum manum meam ore meo
- ²⁸ quae est iniquitas maxima et negatio contra Deum altissimum
- ²⁹ si gavisus sum ad ruinam eius qui me oderat et exultavi quod invenisset eum malum
- ³⁰ non enim dedi ad peccandum guttur meum ut expeterem maledicens animam eius
- ³¹ si non dixerunt viri tabernaculi mei quis det de carnibus eius ut saturemur
- ³² foris non mansit peregrinus ostium meum viatori patuit
- ³³ si abscondi quasi homo peccatum meum et celavi in sinu meo iniquitatem meam
- ³⁴ si expavi ad multitudinem nimiam et despectio propinquorum terruit me et non magis tacui nec egressus sum ostium
- ³⁵ quis mihi tribuat auditorem ut desiderium meum Omnipotens audiat et librum scribat

ipse qui iudicat

³⁶ ut in umero meo portem illum et circumdem illum quasi coronam mihi

³⁷ per singulos gradus meos pronuntiabo illum et quasi principi offeram eum

³⁸ si adversum me terra mea clamat et cum ipsa sulci eius deflent

³⁹ si fructus eius comedi absque pecunia et animam agricolarum eius adflixi

⁴⁰ pro frumento orietur mihi tribulus et pro hordeo spina finita sunt verba Iob

CAPITULUM 32

Omiserunt autem tres viri isti respondere Iob eo quod iustus sibi videretur

² et iratus indignatusque Helii filius Barachel Buzites de cognatione Ram iratus est autem adversus Iob eo quod iustum se esse diceret coram Deo

³ porro adversum amicos eius indignatus est eo quod non invenissent responsionem rationabilem sed tantummodo condemnassent Iob

⁴ igitur Helii expectavit Iob loquentem eo quod seniores se essent qui loquebantur

⁵ cum autem vidisset quod tres respondere non potuissent iratus est vehementer

⁶ respondensque Helii filius Barachel Buzites dixit iunior sum tempore vos autem antiquiores idcirco dimisso capite veritus sum indicare vobis meam sententiam

⁷ sperabam enim quod aetas prolixior loqueretur et annorum multitudo doceret sapientiam

⁸ sed ut video spiritus est in hominibus et inspiratio Omnipotentis dat intelligentiam

⁹ non sunt longevi sapientes nec senes intellegunt iudicium

¹⁰ ideo dicam audite me ostendam vobis etiam ego meam scientiam

¹¹ expectavi enim sermones vestros audivi prudentiam vestram donec disceptaremini sermonibus

¹² et donec putabam vos aliquid dicere considerabam sed ut video non est qui arguere possit Iob et respondere ex vobis sermonibus eius

¹³ ne forte dicatis invenimus sapientiam Deus proiecit eum non homo

¹⁴ nihil locutus est mihi et ego non secundum vestros sermones respondebo illi

¹⁵ extimuerunt non responderunt ultra abstuleruntque a se eloquia

¹⁶ quoniam igitur expectavi et non sunt locuti steterunt nec responderunt ultra

¹⁷ respondebo et ego partem meam et ostendam scientiam meam

¹⁸ plenus sum enim sermonibus et coartat me spiritus uteri mei

¹⁹ en venter meus quasi mustum absque spiraculo quod lagunculas novas dirumpit

²⁰ loquar et respirabo paululum aperiam labia mea et respondebo

²¹ non accipiam personam viri et Deum homini non aequabo

²² nescio enim quamdiu subsistam et si post modicum tollat me factor meus

CAPITULUM 33

Audi igitur Iob eloquia mea et omnes sermones meos ausculta

² ecce aperui os meum loquatur lingua mea in faucibus meis

³ simplici corde meo sermones mei et sententiam labia mea puram loquuntur

⁴ spiritus Dei fecit me et spiraculum Omnipotentis vivificavit me

⁵ si potes responde mihi et adversus faciem meam consiste

⁶ ecce et me sicut et te fecit Deus et de eodem luto ego quoque formatus sum
⁷ verumtamen miraculum meum non te terreat et eloquentia mea non sit tibi gravis
⁸ dixisti ergo in auribus meis et vocem verborum audivi
⁹ mundus sum ego absque delicto immaculatus et non est iniquitas in me
¹⁰ quia querellas in me repperit ideo arbitratus est me inimicum sibi
¹¹ posuit in nervo pedes meos custodivit omnes semitas meas
¹² hoc est ergo in quo non es iustificatus respondebo tibi quia maior sit Deus homine
¹³ adversum eum contendis quod non ad omnia verba responderit tibi
¹⁴ semel loquitur Deus et secundo id ipsum non repetit
¹⁵ per somnium in visione nocturna quando inruit sopor super homines et dormiunt in lectulo
¹⁶ tunc aperit aures virorum et erudiens eos instruit disciplinam
¹⁷ ut avertat hominem ab his quae facit et liberet eum de superbia
¹⁸ eruens animam eius a corruptione et vitam illius ut non transeat in gladium
¹⁹ increpat quoque per dolorem in lectulo et omnia ossa eius marcescere facit
²⁰ abominabilis ei fit in vita sua panis et animae illius cibus ante desiderabilis
²¹ tabescet caro eius et ossa quae tecta fuerant nudabuntur
²² adpropinquabit corruptioni anima eius et vita illius mortiferis
²³ si fuerit pro eo angelus loquens unum de milibus ut adnuntiet hominis aequitatem
²⁴ miserebitur eius et dicet libera eum et non descendat in corruptionem inveni in quo ei propitier
²⁵ consumpta est caro eius a suppliciis revertatur ad dies adolescentiae suae
²⁶ deprecabitur Deum et placabilis ei erit et videbit faciem eius in iubilo et reddet homini iustitiam suam
²⁷ respiciet homines et dicet peccavi et vere deliqui et ut eram dignus non recepi
²⁸ liberavit animam suam ne pergeret in interitum sed vivens lucem videret
²⁹ ecce haec omnia operatur Deus tribus vicibus per singulos
³⁰ ut revocet animas eorum a corruptione et inluminet luce viventium
³¹ adtende lob et audi me et tace dum ego loquar
³² si autem habes quod loquaris responde mihi loquere volo enim te apparere iustum
³³ quod si non habes audi me tace et docebo te sapientiam

CAPITULUM 34

pronuntians itaque Heliu etiam haec locutus est

² audite sapientes verba mea et eruditi auscultate me
³ auris enim verba probat et guttur escas gustu diiudicat
⁴ iudicium eligamus nobis et inter nos videamus quid sit melius
⁵ quia dixit lob iustus sum et Deus subvertit iudicium meum
⁶ in iudicando enim me mendacium est violenta sagitta mea absque ullo peccato
⁷ quis est vir ut est lob qui bibit subsannationem quasi aquam
⁸ qui graditur cum operantibus iniquitatem et ambulat cum viris impiis
⁹ dixit enim non placebit vir Deo etiam si cucurrerit cum eo

10 ideo viri cordati audite me absit a Deo impietas et ab Omnipotente iniquitas
11 opus enim hominis reddet ei et iuxta vias singulorum restituet
12 vere enim Deus non condemnabit frustra nec Omnipotens subvertet iudicium
13 quem constituit alium super terram aut quem posuit super orbem quem fabricatus est
14 si direxerit ad eum cor suum spiritum illius et flatum ad se trahet
15 deficiet omnis caro simul et homo in cinerem revertetur
16 si habes ergo intellectum audi quod dicitur et ausculta vocem eloquii mei
17 numquid qui non amat iudicium sanare potest et quomodo tu eum qui iustus est in tantum condemnas
18 qui dicit regi apostata qui vocat duces impios
19 qui non accipit personas principum nec cognovit tyrannum cum disceptaret contra pauperem opus enim manuum eius sunt universi
20 subito morientur et in media nocte turbabuntur populi et pertransibunt et auferent violentum absque manu
21 oculi enim eius super vias hominum et omnes gressus eorum considerat
22 non sunt tenebrae et non est umbra mortis ut abscondantur ibi qui operantur iniquitatem
23 neque enim ultra in hominis potestate est ut veniat ad Deum in iudicium
24 conteret multos innumerabiles et stare faciet alios pro eis
25 novit enim opera eorum et idcirco inducet noctem et conterentur
26 quasi impios percussit eos in loco videntium
27 qui quasi de industria recesserunt ab eo et omnes vias eius intellegere noluerunt
28 ut pervenire facerent ad eum clamorem egeni et audiret vocem pauperum
29 ipso enim concedente pacem quis est qui condemnet ex quo absconderit vultum quis est qui contempletur eum et super gentem et super omnes homines
30 qui regnare facit hominem hypocritam propter peccata populi
31 quia ergo ego locutus sum ad Deum te quoque non prohibeo
32 si erravi tu doce me si iniquitatem locutus sum ultra non addam
33 numquid a te Deus expetit eam quia displicuit tibi tu enim coepisti loqui et non ego quod si quid nosti melius loquere
34 viri intellegentes loquantur mihi et vir sapiens audiat me
35 lob autem stulte locutus est et verba illius non sonant disciplinam
36 pater mi probetur lob usque ad finem ne desinas in hominibus iniquitatis
37 quia addit super peccata sua blasphemiam inter nos interim constringatur et tunc ad iudicium provocet sermonibus suis Deum

CAPITULUM 35

Igitur Heliu haec rursum locutus est

2 numquid aequa tibi videtur tua cogitatio ut diceres iustior Deo sum
3 dixisti enim non tibi placet quod rectum est vel quid tibi proderit si ego peccavero
4 itaque ego respondebo sermonibus tuis et amicis tuis tecum
5 suspice caelum et intueri et contemplare aethera quod altior te sit
6 si peccaveris quid ei nocebis et si multiplicatae fuerint iniquitates tuae quid facies contra

eum

- ⁷ porro si iuste egeris quid donabis ei aut quid de manu tua accipiet
⁸ homini qui similis tui est nocebit impietas tua et filium hominis adiuvabit iustitia tua
⁹ propter multitudinem calumniatorum clamabunt et heulabunt propter vim brachii tyrannorum
¹⁰ et non dixit ubi est Deus qui fecit me qui dedit carmina in nocte
¹¹ qui docet nos super iumenta terrae et super volucres caeli erudit nos
¹² ibi clamabunt et non exaudiet propter superbiam malorum
¹³ non ergo frustra audiet Deus et Omnipotens singulorum causas intuebitur
¹⁴ etiam cum dixeris non considerat iudicare coram eo et expecta eum
¹⁵ nunc enim non infert furorem suum nec ulciscitur scelus valde
¹⁶ ergo lob frustra aperit os suum et absque scientia verba multiplicat

CAPITULUM 36

addens quoque Heliu haec locutus est

- ² sustine me paululum et indicabo tibi adhuc enim habeo quod pro Deo loquar
³ repetam scientiam meam a principio et operatorem meum probabo iustum
⁴ vere enim absque mendacio sermones mei et perfecta scientia probabitur tibi
⁵ Deus potentes non abicit cum et ipse sit potens
⁶ sed non salvat impios et iudicium pauperibus tribuit
⁷ non aufert a iusto oculos suos et reges in solio conlocat in perpetuum et illi eriguntur
⁸ et si fuerint in catenis et vinciantur funibus paupertatis
⁹ indicabit eis opera eorum et scelera eorum quia violenti fuerint
¹⁰ revelabit quoque aurem eorum ut corripiat et loquetur ut revertantur ab iniquitate
¹¹ si audierint et observaverint conplebunt dies suos in bono et annos suos in gloria
¹² si autem non audierint transibunt per gladium et consumentur in stultitia
¹³ simulatores et callidi provocant iram Dei neque clamabunt cum vincti fuerint
¹⁴ morietur in tempestate anima eorum et vita eorum inter effeminatos
¹⁵ eripiet pauperem de angustia sua et revelabit in tribulatione aurem eius
¹⁶ igitur salvabit te de ore angusto latissime et non habentis fundamentum subter se
requies autem mensae tuae erit plena pinguedine
¹⁷ causa tua quasi impii iudicata est causam iudiciumque recipies
¹⁸ non te ergo superet ira ut aliquem opprimas nec multitudo donorum inclinet te
¹⁹ depone magnitudinem tuam absque tribulatione et omnes robustos fortitudine
²⁰ ne protrahas noctem ut ascendant populi pro eis
²¹ cave ne declines ad iniquitatem hanc enim coepisti sequi post miseriam
²² ecce Deus excelsus in fortitudine sua et nullus ei similis in legislatoribus
²³ quis poterit scrutari vias eius aut quis ei dicere operatus es iniquitatem
²⁴ memento quod ignores opus eius de quo cecinerunt viri
²⁵ omnes homines vident eum unusquisque intuetur procul
²⁶ ecce Deus magnus vincens scientiam nostram numerus annorum eius inaestimabilis
²⁷ qui aufert stillas pluviae et effundit imbres ad instar gurgitum

- 28 qui de nubibus fluunt quae praetexunt cuncta desuper
29 si voluerit extendere nubes quasi tentorium suum
30 et fulgurare lumine suo desuper cardines quoque maris operiet
31 per haec enim iudicat populos et dat escas multis mortalibus
32 in manibus abscondit lucem et praecipit ei ut rursus adveniat
33 adnuntiat de ea amico suo quod possessio eius sit et ad eam possit ascendere

CAPITULUM 37

- S**uper hoc expavit cor meum et emotum est de loco suo
2 audite auditionem in terrore vocis eius et sonum de ore illius procedentem
3 subter omnes caelos ipse considerat et lumen illius super terminos terrae
4 post eum rugiet sonitus tonabit voce magnitudinis suae et non investigabitur cum audita fuerit vox eius
5 tonabit Deus in voce sua mirabiliter qui facit magna et inscrutabilia
6 qui praecipit nivi ut descendat in terram et hiemis pluviis et imbri fortitudinis suae
7 qui in manu omnium hominum signat ut noverint singuli opera sua
8 ingredietur bestia latibulum et in antro suo morabitur
9 ab interioribus egreditur tempestas et ab Arcturo frigus
10 flante Deo concrescit gelu et rursum latissimae funduntur aquae
11 frumentum desiderat nubes et nubes spargunt lumen suum
12 quae lustrant per circuitum quocumque eas voluntas gubernantis duxerit ad omne quod praeceperit illis super faciem orbis terrarum
13 sive in una tribu sive in terra sua sive in quocumque loco misericordiae suae eas iusserit inveniri
14 ausculta haec Iob sta et considera miracula Dei
15 numquid scis quando praeceperit Deus pluviis ut ostenderent lucem nubium eius
16 numquid nosti semitas nubium magnas et perfectas scientias
17 nonne vestimenta tua calida sunt cum perflata fuerit terra austro
18 tu forsitan cum eo fabricatus es caelos qui solidissimi quasi aere fusi sunt
19 ostende nobis quid dicamus illi nos quippe involvimur tenebris
20 quis narrabit ei quae loquor etiam si locutus fuerit homo devorabitur
21 at nunc non vident lucem subito aer cogitur in nubes et ventus transiens fugabit eas
22 ab aquilone aurum venit et ad Deum formidolosa laudatio
23 digne eum invenire non possumus magnus fortitudine et iudicio et iustitia et enarrari non potest
24 ideo timebunt eum viri et non audebunt contemplari omnes qui sibi videntur esse sapientes

CAPITULUM 38

- R**espondens autem Dominus Iob de turbine dixit
2 quis est iste involvens sententias sermonibus inperitis
3 accinge sicut vir lumbos tuos interrogabo te et responde mihi

4 ubi eras quando ponebam fundamenta terrae indica mihi si habes intellegentiam
5 quis posuit mensuras eius si nosti vel quis tetendit super eam lineam
6 super quo bases illius solidatae sunt aut quis dimisit lapidem angularem eius
7 cum me laudarent simul astra matutina et iubilarent omnes filii Dei
8 quis conclusit ostiis mare quando erumpebat quasi de vulva procedens
9 cum ponerem nubem vestimentum eius et caligine illud quasi pannis infantiae
obvolverem
10 circumdedi illud terminis meis et posui vectem et ostia
11 et dixi usque huc venies et non procedes amplius et hic confringes tumentes fluctus
tuos
12 numquid post ortum tuum praecepisti diluculo et ostendisti aurorae locum suum
13 et tenuisti concutiens extrema terrae et excussisti impios ex ea
14 restituetur ut lutum signaculum et stabit sicut vestimentum
15 auferetur ab impiis lux sua et brachium excelsum confringetur
16 numquid ingressus es profunda maris et in novissimis abyssis deambulasti
17 numquid apertae tibi sunt portae mortis et ostia tenebrosa vidisti
18 numquid considerasti latitudines terrae indica mihi si nosti omnia
19 in qua via habitat lux et tenebrarum quis locus sit
20 ut ducas unumquodque ad terminos suos et intellegas semitas domus eius
21 sciebas tunc quod nasciturus esses et numerum dierum tuorum noveras
22 numquid ingressus es thesauros nivis aut thesauros grandinis aspexisti
23 quae praeparavi in tempus hostis in diem pugnae et belli
24 per quam viam spargitur lux dividitur aestus super terram
25 quis dedit vehementissimo imbri cursum et viam sonantis tonitru
26 ut plueret super terram absque homine in deserto ubi nullus mortalium commoratur
27 ut impleret inviam et desolatam et produceret herbas virentes
28 quis est pluviae pater vel quis genuit stillas roris
29 de cuius utero egressa est glacies et gelu de caelo quis genuit
30 in similitudinem lapidis aquae durantur et superficies abyssi constringitur
31 numquid coniungere valebis micantes stellas Pliadis aut gyrum Arcturi poteris dissipare
32 numquid producis luciferum in tempore suo et vespere super filios terrae consurgere
facis
33 numquid nosti ordinem caeli et pones rationem eius in terra
34 numquid elevabis in nebula vocem tuam et impetus aquarum operiet te
35 numquid mittes fulgura et ibunt et revertentia dicent tibi adsumus
36 quis posuit in visceribus hominis sapientiam vel quis dedit gallo intellegentiam
37 quis enarravit caelorum rationem et concentum caeli quis dormire faciet
38 quando fundebatur pulvis in terram et glebae conpingebantur
39 numquid capies leaenae praedam et animam catulorum eius implebis
40 quando cubant in antris et in specubus insidiantur
41 quis praeparat corvo escam suam quando pulli eius ad Deum clamant vagantes eo
quod non habeant cibos

CAPITULUM 39

- n**umquid nosti tempus partus hibicum in petris vel parturientes cervas observasti
² dinumerasti menses conceptus earum et scisti tempus partus earum
³ incurvantur ad fetum et pariunt et rugitus emittunt
⁴ separantur filii earum pergunt ad pastum egrediuntur et non revertuntur ad eas
⁵ quis dimisit onagrum liberum et vincula eius quis solvit
⁶ cui dedi in solitudine domum et tabernacula eius in terra salsuginis
⁷ contemnit multitudinem civitatis clamorem exactoris non audit
⁸ circumspicit montes pascuae suae et virentia quaeque perquirat
⁹ numquid volet rinoceros servire tibi aut morabitur ad praesepe tuum
¹⁰ numquid alligabis rinocerota ad arandum loro tuo aut confringet glebas vallium post te
¹¹ numquid fiduciam habebis in magna fortitudine eius et derelinques ei labores tuos
¹² numquid credes ei quoniam reddat sementem tibi et aream tuam congregat
¹³ pinna strutionum similis est pinnis herodii et accipitris
¹⁴ quando derelinquit in terra ova sua tu forsitan in pulvere calefacis ea
¹⁵ obliviscitur quod pes conculcet ea aut bestiae agri conterant
¹⁶ duratur ad filios suos quasi non sint sui frustra laboravit nullo timore cogente
¹⁷ privavit enim eam Deus sapientia nec dedit illi intellegentiam
¹⁸ cum tempus fuerit in altum alas erigit deridet equitem et ascensorem eius
¹⁹ numquid praebebis equo fortitudinem aut circumdabis collo eius hinnitum
²⁰ numquid suscitabis eum quasi lucustas gloria narium eius terror
²¹ terram ungula fodit exultat audacter in occursum pergit armatis
²² contemnit pavorem nec cedit gladio
²³ super ipsum sonabit faretra vibrabit hasta et clypeus
²⁴ fervens et fremens sorbet terram nec reputat tubae sonare clangorem
²⁵ ubi audierit bucinam dicet va procul odoratur bellum exhortationem ducum et ululatum exercitus
²⁶ numquid per sapientiam tuam plumescit accipiter expandens alas suas ad austrum
²⁷ aut ad praeceptum tuum elevabitur aquila et in arduis ponet nidum suum
²⁸ in petris manet et in praeruptis silicibus commoratur atque inaccessis rupibus
²⁹ inde contemplatur escam et de longe oculi eius prospiciunt
³⁰ pulli eius lambent sanguinem et ubicumque cadaver fuerit statim adest

CAPITULUM 40

(39:31)

- e**t adiecit Dominus et locutus est ad Iob
² (39:32) numquid qui contendit cum Deo tam facile conquiescit utique qui arguit Deum debet respondere ei
³ (39:33) respondens autem Iob Domino dixit
⁴ (39:34) qui leviter locutus sum respondere quid possum manum meam ponam super os meum
⁵ (39:35) unum locutus sum quod utinam non dixissem et alterum quibus ultra non addam

- ⁶ (40:1) respondens autem Dominus Iob de turbine ait
⁷ (40:2) accinge sicut vir lumbos tuos interrogabo te et indica mihi
⁸ (40:3) numquid irritum facies iudicium meum et condemnabis me ut tu iustificeris
⁹ (40:4) et si habes brachium sicut Deus et si voce simili tonas
¹⁰ (40:5) circumda tibi decorem et in sublime erigere et esto gloriosus et speciosis induere vestibus
¹¹ (40:6) disperge superbos furore tuo et respiciens omnem arrogantem humilia
¹² (40:7) respice cunctos superbos et confunde eos et contere impios in loco suo
¹³ (40:8) absconde eos in pulvere simul et facies eorum demerge in foveam
¹⁴ (40:9) et ego confitebor quod salvare te possit dextera tua
¹⁵ (40:10) ecce Behemoth quem feci tecum faenum quasi bos comedit
¹⁶ (40:11) fortitudo eius in lumbis eius et virtus illius in umbilicis ventris eius
¹⁷ (40:12) constringit caudam suam quasi cedrum nervi testiculorum eius perplexi sunt
¹⁸ (40:13) ossa eius velut fistulae aeris cartilago illius quasi laminae ferreae
¹⁹ (40:14) ipse principium est viarum Dei qui fecit eum adplicabit gladium eius
²⁰ (40:15) huic montes herbas ferunt omnes bestiae agri ludent ibi
²¹ (40:16) sub umbra dormit in secreto calami et locis humentibus
²² (40:17) protegunt umbrae umbram eius circumdabunt eum salices torrentis
²³ (40:18) ecce absorbebit fluvium et non mirabitur habet fiduciam quod influat Iordanis in os eius
²⁴ (40:19) in oculis eius quasi hamo capiet eum et in sudibus perforabit nares eius

CAPITULUM 41

(40:20)

- A**n extrahere poteris Leviathan hamo et fune ligabis linguam eius
² (40:21) numquid pones circulum in naribus eius et armilla perforabis maxillam eius
³ (40:22) numquid multiplicabit ad te preces aut loquetur tibi mollia
⁴ (40:23) numquid feriet tecum pactum et accipies eum servum sempiternum
⁵ (40:24) numquid inludes ei quasi avi aut ligabis illum ancillis tuis
⁶ (40:25) concident eum amici dividant illum negotiatores
⁷ (40:26) numquid implebis sagenas pelle eius et gurgustium piscium capite illius
⁸ (40:27) pone super eum manum tuam memento belli nec ultra addas loqui
⁹ (40:28) ecce spes eius frustrabitur eum et videntibus cunctis praecipitabitur
¹⁰ (41:1) non quasi crudelis suscitabo eum quis enim resistere potest vultui meo
¹¹ (41:2) quis ante dedit mihi ut reddam ei omnia quae sub caelo sunt mea sunt
¹² (41:3) non parcam ei et verbis potentibus et ad deprecandum conpositis
¹³ (41:4) quis revelavit faciem indumenti eius et in medium oris eius quis intrabit
¹⁴ (41:5) portas vultus eius quis aperiet per gyrum dentium eius formido
¹⁵ (41:6) corpus illius quasi scuta fusilia et compactum squamis se prementibus
¹⁶ (41:7) una uni coniungitur et ne spiraculum quidem incedit per eas
¹⁷ (41:8) una alteri adhaerent et tenentes se nequaquam separabuntur
¹⁸ (41:9) sternutatio eius splendor ignis et oculi eius ut palpebrae diluculi

- ¹⁹ (41:10) de ore eius lampades procedunt sicut taedae ignis accensae
- ²⁰ (41:11) de naribus eius procedit fumus sicut ollae succensae atque ferventis
- ²¹ (41:12) halitus eius prunas ardere facit et flamma de ore eius egreditur
- ²² (41:13) in collo eius morabitur fortitudo et faciem eius praecedet egestas
- ²³ (41:14) membra carniū eius coherentia sibi mittet contra eum fulmina et ad locum alium non ferentur
- ²⁴ (41:15) cor eius indurabitur quasi lapis et stringetur quasi malleatoris incus
- ²⁵ (41:16) cum sublatus fuerit timebunt angeli et territi purgabuntur
- ²⁶ (41:17) cum adprehenderit eum gladius subsistere non poterit neque hasta neque torax
- ²⁷ (41:18) reputabit enim quasi paleas ferrum et quasi lignum putridum aes
- ²⁸ (41:19) non fugabit eum vir sagittarius in stipulam versi sunt ei lapides fundae
- ²⁹ (41:20) quasi stipulam aestimabit malleum et deridebit vibrantem hastam
- ³⁰ (41:21) sub ipso erunt radii solis sternet sibi aurum quasi lutum
- ³¹ (41:22) ferverescere faciet quasi ollam profundum mare ponet quasi cum unguenta bulliunt
- ³² (41:23) post eum lucebit semita aestimabit abyssum quasi senescentem
- ³³ (41:24) non est super terram potestas quae conparetur ei qui factus est ut nullum timeret
- ³⁴ (41:25) omne sublime videt ipse est rex super universos filios superbiae

CAPITULUM 42

Respondens autem Iob Domino dixit

- ² scio quia omnia potes et nulla te latet cogitatio
- ³ quis est iste qui celat consilium absque scientia ideo insipienter locutus sum et quae ultra modum excederent scientiam meam
- ⁴ audi et ego loquar interrogabo et ostende mihi
- ⁵ auditu auris audivi te nunc autem oculus meus videt te
- ⁶ idcirco ipse me reprehendo et ago paenitentiam in favilla et cinere
- ⁷ postquam autem locutus est Dominus verba haec ad Iob dixit ad Eliphaz Themaniten iratus est furor meus in te et in duos amicos tuos quoniam non estis locuti coram me rectum sicut servus meus Iob
- ⁸ sumite igitur vobis septem tauros et septem arietes et ite ad servum meum Iob et offerte holocaustum pro vobis Iob autem servus meus orabit pro vobis faciem eius suscipiam ut non vobis imputetur stultitia neque enim locuti estis ad me recta sicut servus meus Iob
- ⁹ abierunt ergo Eliphaz Themanites et Baldad Suites et Sophar Naamathites et fecerunt sicut locutus fuerat ad eos Dominus et suscepit Dominus faciem Iob
- ¹⁰ Dominus quoque conversus est ad paenitentiam Iob cum oraret ille pro amicis suis et addidit Dominus omnia quaecumque fuerant Iob duplicia
- ¹¹ venerunt autem ad eum omnes fratres sui et universae sorores suae et cuncti qui noverant eum prius et comederunt cum eo panem in domo eius et moverunt super eum caput et consolati sunt eum super omni malo quod intulerat Dominus super eum et dederunt ei unusquisque ovem unam et inaurem auream unam
- ¹² Dominus autem benedixit novissimis Iob magis quam principio eius et facta sunt ei quattuordecim milia ovium et sex milia camelorum et mille iuga boum et mille asinae

¹³ et fuerunt ei septem filii et filiae tres

¹⁴ et vocavit nomen unius Diem et nomen secundae Cassia et nomen tertiae Cornu stibii

¹⁵ non sunt autem inventae mulieres speciosae sicut filiae Iob in universa terra deditque eis pater suus hereditatem inter fratres earum

¹⁶ vixit autem Iob post haec centum quadraginta annis et vidit filios suos et filios filiorum suorum usque ad quartam generationem

¹⁷ (42:16) et mortuus est senex et plenus dierum

For other languages please go to **www.wordproject.org**